

CBETA電子佛典集成

CBETA Chinese Electronic Tripitaka Collection
eBook

T21n1333

虛空藏菩薩問七佛 陀羅尼呪經

失譯

目次

- [編輯說明](#)
- [章節目次](#)
- [卷目次](#)
 - 001
- [贊助資訊](#)

編輯說明

- 本電子書以「CBETA 電子佛典集成 Ver si on 2023.Q4」為資料來源。
- 漢字呈現以 Uni code 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

如是我聞：

一時佛住雞羅莎山，在山頂上諸天住處，去諸賢聖不遠，與大眾俱前後圍繞，大比丘足滿五百，又有五百諸大菩薩俱，其名曰：彌勒菩薩、虛空藏菩薩、普賢菩薩、無盡華菩薩、文殊師利菩薩，與五百菩薩摩訶薩等，皆一生補處。

爾時世尊觀於四方，去其住處不遠，觀見林中有一比丘，為惡鬼所持，口出種種惡言。其林中又有一比丘，露其身形而舉兩手，口出種種異音，或復呼天乍復喚地。爾時虛空藏菩薩摩訶薩聞其聲已，承佛神力，整理衣服右膝著地，合掌向佛，白佛言：「世尊！此二比丘何意唱如是聲，或舉於兩手復出惡言音？」於是世尊告虛空藏菩薩摩訶薩言：「此一比丘為惡病所持，出是音聲。又一比丘為惡鬼所持，露形而走。」

爾時虛空藏菩薩摩訶薩白佛言：「世尊！為治眾生一切病故、為除一切惡鬼障難不起故，唯願世尊為一切眾生說陀羅尼呪。」

爾時世尊現威神力，於虛空中即現六佛。時釋迦牟尼佛即騰虛空依次而坐，是時大眾悉皆觀見七佛世尊。

爾時毘婆尸佛為一切眾生故、為除一切惡鬼障難故，說大威德陀羅尼呪。而說呪曰：

「南無佛陀耶 南無達摩耶 南無僧伽耶 南無毘婆尸 多他伽多耶 呵羅呵提三藐三佛陀耶 唵 呵羅呵羅 醯利醯羅耶 南無雞利吉羅耶 閱伽無遮那耶 南無南摩娑波呵」

爾時毘婆尸佛告虛空藏菩薩摩訶薩言：「若有善男子善女人受持此呪者，若讀若誦；若復有人推覓此呪者、若樂聽聞者，是人為一切刀仗所害、不為一切水溺、不為一切苦患所持、不受一切橫死。若復有人與持此呪人毒藥者，其藥變成美食，不著於人。若復有人若飲若食，先呪作七遍然後而食，食已是諸蠱道惡口眾邪皆悉自滅不能為害。若受持是呪者，令人壽命延長，所有習誦一聞領悟終不忘失，晝夜恒見佛像。若復有人為惡鬼所打不得差者，而於此人耳邊呪之七遍即時除愈。若有人患團風白癩及以癩病，取蘇曼青、水香蓮華、茴香、細辛各以等分，取胡麻油煎之，摩其患處即得除愈。一切所有病者，用此呪呪之無不獲差。」

爾時尸棄佛在於空中，欲為一切眾生除一切病故、欲除一切惡鬼障難故，而說呪曰：

「南無佛陀耶 南無達摩耶 南無僧伽耶 南無尸棄禰多陀伽多
耶 阿羅訶提三藐三佛陀 唵 波遮波遮 波遮波耶 薩婆浮多南
嗔陀吉羅耶 波邏毘陀南 娑波呵」

爾時尸棄佛告虛空藏菩薩摩訶薩言：「我此神呪，百千那由他無數
億諸佛所說，我今說之，為一切眾生故、除一切病故、除一切諸惡
鬼障難故、除一切惡夢故、除一切橫病死故。」又告虛空藏菩薩摩
訶薩言：「若有善男子善女人，若晝誦此呪三遍、夜誦三遍，或復
心念，一切蠱毒、厭禱呪詛、惡口赤舌、眾耶魍魎皆不得近，昏夜
警中恒見諸佛，所有食噉之物即自消化而充氣力。其人若命終已，
昏夜所見佛者皆來迎其精神恒相隨逐。若復有人依此呪法作功能
者，於一切病須結呪索。若有人困病時，取蘇曼木取油煎之，摩其
身體，皆得除愈。若有眾生晝夜恐怖，取淨水呪之灑著四方，作呪
索繫其身上，一切魍魎不得其便。若有小兒被惡鬼所打，用碧縵作
呪索，繫著頸下，即得除愈。若復有人被惡鬼所打，於耳邊呪作七
遍，亦得除愈。隨心所欲造者，無不得成。」

爾時毘舍浮佛在虛空中，欲為一切眾生除一切病故、除一切諸惡鬼
故、障難不起故而說呪曰：

「南無佛陀耶 南無達摩耶 南無僧伽耶 南無毘舍浮多他竭多
耶 阿羅訶提三藐三佛陀耶 唵 伽邏伽邏伽邏伽邏 拘樓拘樓拘
樓拘樓 拘盧蹉陀喃 拘樓薩婆伽呵喃 娑波呵」

爾時毘舍浮佛說此呪已，告虛空藏菩薩摩訶薩言：「如此神呪，賢
劫千佛中過去佛已說此呪、現在佛今說、未來佛當說。」又告虛空
藏菩薩言：「汝當受持此呪。若未來世復有眾生受持呪者，若讀若
誦，若復有人推覓此呪，不為刀杖怖畏，一切蠱毒、一切熱病、一
切水溺，不受橫死、不被惡病，如是等悉得除却，唯宿殃不除耳。
若有比丘、比丘尼、優婆塞、優婆夷，晨起澡浴并洗頭面，在於佛
前誦此呪一百八遍，一切諸惡不加其身，一切疾病自然除愈，壽命
延長，一切財寶自然富足，一切身中障難不善之事皆各銷除，一切
怨家自然和解，一切厭禱皆不著身。澡浴誦呪因緣得如此福。若有
人於嶮難怖畏之處，能憶念此呪，皆得離於恐怖。若復有人鬪諍、
為縣官口舌，以白縵結呪索，呪之一百八遍，繫其右臂上。若有人
眼痛者，以桔皮結呪索，繫其耳上。若他方有賊欲來侵境者，用
酥、酪、蜜、胡麻等分和之，在佛像前用銅鉢卷一鉢，呪之一遍擲
著火中，至一千八遍，是諸怨賊無問遠近自然退散。若復有人欲求
長命者，當用酪、蜜、炒粳米為華，三種等分和之，在於佛前以銅
鉢卷之一鉢，呪之一遍擲著火中，至一千八遍然後乃止。又復有
人，欲為自身及為他人一切怖畏、一切諸罪欲得除滅者，欲求一切
富貴財寶者，欲除身中障難令得清淨者。若復有人欲誦持此呪，一

切怖畏障難悉自除滅，所作成就，又復依一切呪法者亦得成就，若有一切怨家不得其便。若有人欲作法，當須合藥塗身，須茴香、須稻米、須那羅陀尸利沙、須沈水香、尸利耶、鬱金香、須香附子、須因陀婆路、須菩提樹木，如是等藥等分和之，晨朝起淨洗浴以藥塗身。若復有人欲見國王大臣，須在於像前然桔木為火，用五指撮胡麻，呪之一遍擲著火中，如此一千八遍乃止。若有善男子善女人，欲得一切怨家自然和解，當淨洗浴著淨衣，中夜時在於佛前以香華供養，當用粳米炒以為華，取桔木然為火，以三指撮取米華，呪之一遍擲著火中，如此一千八遍然後乃止。若有善男子善女人，夜見惡夢怨家伺求其便，一切所作不得諧偶者，於十四日朝全不得食，至於日暮以香湯洗浴其身著新淨衣，在於佛前誦呪，隨其力分不限多少，唯盡力至之乃止，不得出其道場，仍於像前眠睡。到十五日晨朝，即起淨洗釜，著滿中淨水作湯。其湯中須取有名草木種種隨分著於湯中，漉其草出，然後著丁香、紫檀、白檀磨作末、隨分投著湯中、須銅瓮受五斗者二口、取香水滿瓮盛之、著於像前、呪之一千八遍竟、即用此湯洗浴其身、然後乃食。若復有人被毒藥者、須紫檀木寸截之如筋大作一千八段、以牛糞塗之、在於像前然火、取木一段呪之一遍擲著火中、一千八遍然後乃止、稱病人名。我為彼人除其藥毒、即得除愈。此呪功能說不可盡。若心中所欲作事者、依此呪法無不成就。」

爾時拘樓孫佛在於空中，為一切眾生除一切病故、除一切惡鬼障難故而說呪曰：

「南無佛陀耶 南無達摩耶 南無僧伽耶 南無拘樓孫 多伽多耶 阿羅呵提三藐三佛陀耶 唵 伽吒伽吒伽吒伽吒 吉帝吉帝吉帝吉帝 南無薩婆多 伽伽帝毘逾 阿羅呵諦三藐三佛陀毘耶 娑波呵」

爾時拘樓孫佛說此呪已，告虛空藏菩薩摩訶薩言：「此呪是恒河沙同名拘樓孫佛已說，我今說之，我亦讚歎此呪不可思議無量功德，汝今至心受持。若未來世有人受持此呪者，於三寶中至心敬信者，香湯洗浴著新淨衣，以香華供養佛像，在於像前胡跪合掌，誦呪一百八遍，於七百身中自知宿命。若欲生天中，諸天之王；若生人中則為轉輪聖王。若能日日受持，其人命終則往生無量壽國不生人中。若人晝夜讀誦此呪者，所有一切橫病不著其身。若欲食時，先當呪之七遍然後乃食，身中一切疾病自然除愈。若有人被一切惡鬼所打或為惡鬼所著者，作好香湯，以此呪呪之一千八遍，然後用此湯與病人洗浴，仍以此呪呪此病人一千八遍，其病即得除愈。

「若復有人身生惡瘡者，以鑢鐵刀呪此病人，又取銅鍼呪之，然後鍼此瘡上即得除愈。若復有人被一切牢獄繫縛，用此呪呪其手七遍

以自摩面，一切官事自然解脫。若人恒受持此呪者，一切財物自然充足無所乏少，一切障難即得消滅。若人欲求見佛者，淨持房舍香泥塗地，安置佛像，懸繒幡蓋、香華供養，香湯浴身著淨衣服，燒沈水香，在於像前胡跪面向東、其像面向西，誦呪一千八遍。誦訖即於像前頭向東眠，於其夢中即得見佛，心裏所有憶念爾時即見。或念其命長短，爾時即得自知；或念其身有病無病，爾時亦見；或有怨家鬪諍，勝負皆知。如是等心所念者，爾時皆知。感是夢已，身中一切障難疾病悉自消除無復遺餘。」

爾時拘那含牟尼佛在於空中，欲為一切眾生除諸病故、除一切惡鬼障難故而說呪曰：

「南無佛陀耶 南無達摩耶 南無僧伽耶 南無伽那伽牟尼易 多
吽伽多阿羅呵提三藐三佛陀耶 唵 莎羅莎羅莎羅莎羅 私利私利
私利私利 私羅波耶 陀摩陀摩陀摩陀摩 頭牟頭牟頭牟頭牟 頭
摩波夜南無那摩伽那伽牟尼易 多吽伽多易 阿羅呵滌三藐三佛陀
耶 私田鬪 曼多羅波羅娑波呵」

爾時拘那含牟尼佛告虛空藏菩薩摩訶薩言：「若善男子善女人受持此呪、抄寫流通者，則遠一切怨家不得其便，火不能燒、水不能溺，不為雷電霹靂所近。若有人以毒藥與持是呪人，是人食之如飡羹饌，自然銷化無諸毒氣，不為一切橫死等畏，一切所食入腹自然銷化，得色得力壽命延長，恒常富貴財寶自然，一切諸佛憶念擁護。若人過去有三障重業，能日誦此呪三遍，即得除滅。

「若復有人自病他病若欲治者，淨治房舍香泥塗地，懸繒幡蓋，安置高座施設佛像。其人香湯浴身，燒沈水、薰陸等香，種種素食持以獻佛，隨力取辦。病人在於像前，稱病人名而呪之，即得除愈。一切鬼神魍魎著人，以此呪呪香水浴身，即自消除。

「若復有人身生團風白癬及以癩病，取菖蒲根搗以為末一升，以白蜜和之，在於像前呪之一千八遍。晨朝未食，日取方寸匕服之即得除愈，及餘一切宿癬亦得除愈。

「若有人患寒熱病者，或四日一發、或三日一發、或二日一發、或一日一發，取雜華為冠，在於像前呪一千八遍，貫病人頭上，即得除愈。若復有人為惡鬼所打，口噤不言，在於病人耳邊小聲呪之一百八遍，即得除愈。

「若復有人為顛鬼所打，或富單鬼、迦吒富單那鬼、毘舍闍鬼、鳩槃荼鬼、一切諸惡鬼等，取獻佛身上花呪之一千八遍燒之，熏於病人鼻，其烟入鼻即得除愈。若心中所念者悉得成就。此呪如是功能，說不可盡。」

爾時迦葉佛在虛空中，欲為眾生除一切惡病故、除一切惡鬼障難故而說呪曰：

「南無佛陀耶 南無達摩耶 南無僧伽耶 唵 呵邏呵邏呵邏呵
邏 呵呵呵 南無迦葉波耶 多吽伽多耶阿羅呵提三藐三佛陀 私
田妬 曼多羅波陀 娑波呵」

爾時迦葉佛告虛空藏菩薩摩訶薩言：「我此呪是恒河沙諸佛所說，
我今已說，汝今受持讀誦，晝夜憶念勿令忘失。未來世中若有善男
子善女人受持此呪者，一日中三時誦之，隨力多少，其人昏夜警中
得見諸佛。若得此警，一切重罪自然消滅。若有作五逆罪不信大乘
者，如是重罪不可救拔；所有事業，誦此呪已悉得成就。一切團風
白癩癩病等，取佛上華在於像前呪之一千八遍，搗以為末，冷水和
之，塗其病處即得除愈，及和冷水飲之亦良。若復有人得頭痛病
者，取佛上華在於像前呪之一千八遍，搗以為末，和冷水，分為三
分，塗於頭上，乾竟更著，如是三遍即得除愈。若婦人生產難者，
取佛上華搗為末，和牛酥煎之，煎竟置於像前呪之一千八遍，塗其
產門，兒即易生，身即平復。若天多雨不晴，取佛上華在於佛前呪
之一千八遍，出於空地燒之，即得止斷。若復有人為惡鬼所打，口
噤不言，或為毘舍闍鬼所打、或有癖病或患濕病，取佛上華搗為末
和酒，若葡萄酒及以米酒，銀椀盛之，在於像前呪之一千八遍，與
病人服之，即得除差。一切所有事業，皆在於像前呪之一千八遍，
悉得成就。若欲為一切事，讀誦此呪莫生疑心。」

爾時釋迦牟尼佛在虛空中，欲為眾生除一切病故、除一切惡鬼障難
故而說呪曰：

「南無佛陀耶 南無達摩耶 南無僧伽耶 南無賒迦牟尼耶 多他
伽多耶 阿羅呵提三藐三佛陀耶 怛[口*姪]吽 求弭 求弭 摩
訶求弭 多麗多麗 摩訶多麗 遮麗遮麗 摩訶遮麗 達麗達麗
摩訶達麗 帝利帝利 摩訶帝利 呵呵 吉利吉利 摩訶吉利 周
漏周漏 摩訶周漏 彌利彌利 摩訶彌利 帝利帝利 摩訶帝利
頭弭頭弭 摩訶頭弭 遮麗遮麗 摩訶遮麗 棄利棄利 摩訶棄
利 支利支利 摩摩支利 娑波呵」

爾時釋迦牟尼佛告虛空藏菩薩摩訶薩言：「若有善男子善女人受持
讀誦、晝夜憶念此呪者，其人不為一切刀杖等畏，不為一切惡病所
著，不受一切橫死。如前六佛所說功能，我此呪者亦復如是無有異
也。」

爾無虛空藏菩薩摩訶薩白佛言：「世尊！我今欲說呪者，防護七佛
所說神呪故，是以復更說之。此呪能破一切罪障。」而說呪曰：

「南無佛陀耶 南無達摩耶 南無僧伽耶 阿迦舍竭婆耶 菩提薩
多波耶 摩訶薩多波耶 摩訶迦盧尼迦耶 多[口*姪]吽 支利支
利 摩訶支利 兜漏兜漏 摩訶兜漏 闍婆利闍婆利 摩訶闍婆
利 醯利醯利 摩訶醯利 娑波呵」

「其呪所有功能者，我今說之。若人為惡鬼所打，須結呪索呪之一千八遍，用蘇曼木、用酥、芥子三種等分和之，在病人前用三指撮取，呪之一遍擲著火中。如此一千八遍乃止，其病即得除愈。

「若復有人恐怖欲結界者，當取刀呪之一千八遍，當戶安之，若人在空中結界，畏諸惡鬼求便者，當取水呪之七遍用灑四方。若自身中有恐怖者，結呪索用自防身。若有人被毒藥者，取古縷草用呪病人，即得除愈。若有風病者，呪香油一千八遍塗其所病，即得除愈。若有人患耳痛者，取青木香用油煎之，持灌其耳，即得除差。若人患腹痛者，取烏鹽呪之一百八遍，與病人服之，即得除愈。若有人患齒痛者，取蘇曼水呪一百八遍，打碎用持刷齒，即得除痛。若有小兒晝夜驚啼怖畏者，取白縲用結呪索，呪之一百八遍，繫小兒項下，即得除怖。若有人頭痛者，取鑕鐵刀或用手呪之一百八遍，摩於頭上，即得除差。若有人被他厭[示*厭]呪詛者，取鑕鐵刀七日七夜用呪病人，即得除愈。若有雷電霹靂起時，用手折取石榴枝，不得除刺葉，手捉向於鳴處呪之一百八遍，即得除却。一切所欲造於事業者，讀誦此呪，悉用香華先供養，然後誦呪，無不成就。」說是經已，虛空藏菩薩摩訶薩、天龍八部一時歡喜讚歎，一心奉行。

虛空藏菩薩問七佛陀羅尼呪經

[CBETA 贊助資訊](https://www.cbeta.org/donation/index.php)

[.\(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。(銀聯卡不支援定期定額)

[前往捐款](#)

劃撥捐款

郵政劃撥帳號：5 0 4 6 8 2 8 5

戶名：財團法人佛教電子佛典基金會

欲指定特殊用途者，請特別註明，我們會專款專用。

線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人佛教電子佛典基金會」。

For donations by check, please write the check to
"Comprehensive Buddhist Electronic Text Archive
Foundation".
